

妙法蓮華經

提婆達多品 第十一

深達罪福相

徧照於十方

微妙淨法身

具相三十二

以八十種好

用莊嚴法身

天人所戴仰

龍神咸恭敬

一切衆生類

無不宗奉者

又聞成菩提

唯仏当証知

我闡大乘教

度脱苦衆生

爾時舍利弗。

語龍女言。

汝謂不久。

得無上道。

是事難信。

所以者何。

女身垢穢。

非是法器。

云何能得。

無上菩提。

仏道懸曠。

逕無量劫。

勤苦積行。

具修諸度。

然後乃成。

又女人身。

猶有五障。

一者不得。

作梵天王。

二者帝釈。

三者魔王。

四者轉輪聖王。

五者仏身。

云何女身。

速得成仏。

爾時龍女。

有一宝珠。

価直三千大千世界。

持以上仏。

仏即受之。

龍女謂智積菩薩。

尊者舍利弗言。我献宝珠。

世尊納受。是事疾不。

答言甚疾。女言。以汝神力。

觀我成仏。復速於此。

當時衆会。皆見竜女。

忽然之間。變成男子。

具菩薩行。即往南方。

無垢世界。坐宝蓮華。

成等正覚。三十二相。

八十種好。普為十方。

一切衆生。演説妙法。

爾時娑婆世界。菩薩声聞。

天竜八部。人与非人。

皆遙見彼。竜女成仏。

普為時会。人天説法。

心大歡喜。悉遙敬礼。

無量衆生。聞法解悟。

得不退転。無量衆生。

得受道記。無垢世界。

六反震動。娑婆世界。

三千衆生。住不退地。

三千衆生。発菩提心。

而得受記。智積菩薩。

及舍利弗。一切衆会。

默然信受。